

ԱՐԱՄ ՀՈՎՀԱՆՆԻՍՅԱՆ

Պատմական գիտությունների թեկնածու

ՄԻ ԴՐՎԱԳ ՍՄԻ ԿԱԹՈՂԻԿՈՍՈՒԹՅԱՆ ԵՎ ՀՌՈՄԻ ՊԱՊԱԿԱՆ ԱԹՈՌԻ ՀԱՐԱԲԵՐՈՒԹՅՈՒՆՆԵՐԻ ՊԱՏՄՈՒԹՅՈՒՆԻՑ

(XIV դարի առաջին տասնամյակ)

Դարեր շարունակ Հայ Եկեղեցին կարևոր դեր է խաղացել ոչ միայն ժողովրդի հոգևոր կյանքում, այլ նաև քաղաքական հարցերում: Եկեղեցու դերը ավելի ուժեղացավ այն ժամանակ, երբ պետականության բացակայության պայմաններում նա փորձեց իր վրա վերցնել նաև **կառավարման** որոշ գործառնություններ: Եկեղեցին էր նաև այն հզոր ուժը, որն առաջնորդում էր ժողովրդին ազատագրական պայքարում՝ ընդդեմ թշնամիների: XIV դ. առաջին տասնամյակում դեռևս պատմության թատերաբեմում էր գտնվում Կիլիկիայի հայկական թագավորությունը, որի պատմության մեջ իր առանձնահատուկ տեղն է գրավում Հայ Եկեղեցին: Սա կարևոր է ոչ միայն հայոց պատմության, այլ նաև Հայ Եկեղեցու պատմության ուսումնասիրման համար: Մասնավորապես առանձնահատուկ ուշադրության է արժանի այս շրջանում Հայ Եկեղեցու հարաբերությունները Հռոմեական Եկեղեցու հետ: Մինչև օրս էլ երկկողմ եկեղեցական հարաբերությունները շատ քիչ են ուսումնասիրված և մի շարք հարցերին տրված չեն սպառիչ պատասխաններ: Հայտնի է, որ դեռևս 1149 թ. Գրիգոր Գ. Պահլավունին Եփրատ գետի ափին¹ գտնվող կաթողիկոսական աթոռը տեղափոխեց Հռոմկլա բերդը. «Փոխեաց զաթոռն հայրապետական ի բերդն, որ կոչի Հռոմկլայ»²:

Ինչ վերաբերում է հայ-հռոմեական եկեղեցական հարաբերություններին, ապա ինչպես նշում է հետազոտող Ա. Զամինյանը, դրանք սկսվել են դեռևս XI դարի վերջերին, երբ Արևմուտքի խաչակիրները մտան Մերձավոր Արևելք՝ Սուրբ Գերեզմանն անհավատներից ազատելու համար³: Հայերը բավականին սերտ հարաբերություններ հաստատեցին խաչակիրների հետ, և քանի որ Արևմտյան Եվրոպայում իշխանությունը Հռոմի պապերի ձեռքին էր, ուստի նրանց հետ ևս սկսեցին հարաբերություններ հաստատել՝ թղթակցությամբ և պատգամավորությամբ: Այդ հարաբերությունների արդյունքում էլ հրապարակ իջավ Հայ և Լատին Եկեղեցիների միության խնդիրը: Հայ կաթողիկոսներն ու իշխանները, պապերից քաղաքական օգնություն ստանալու ակնկալիքով, որոշակի զիջումների գնալու պատրաստակամություն հայտնեցին, որն էլ, անշուշտ, պետք է որոշակի դժգոհություններ առաջ բերեր ինչ-

¹ Կիրակոս Գանձակեցի, Պատմություն Հայոց, Երևան, 1961, էջ 108: Այդ մասին տե՛ս նաև Վարդան Արևելցի, Տիեզերական պատմություն, Երևան, 2001, էջ 174: Տե՛ս նաև Ա. Զամինյան, Հայ Եկեղեցու պատմություն, Երևան, 1992, էջ 100, Կ. Սուրբաթյան, Կիլիկիան կայսրությունների խաչմերուկում, Երևան, 2001, էջ 373, F. Tournebize, Histoire politique et religieuse de L'Arménie, Paris, 1910, p. 238:

² Կիրակոս Գանձակեցի, էջ 108:

³ Ա. Զամինյան, նշվ. աշխ., էջ 92-93:

պես պատմական Հայաստանում, այնպես էլ բուն Կիլիկիայում:

Հայ-հռոմեական եկեղեցական հարաբերություններն ավելի ջերմացան XIV դ. սկզբներին, երբ Արևելքում վերացան խաչակրաց պետությունները⁴, իսկ Կիլիկիայի դաշնակից մոնղոլներն էլ թուլացան: Նման պայմաններում հայոց արքունիքն իր հայացքը հառեց դեպի Արևմուտք, մասնավորապես Հռոմ՝ Պապի միջոցով ցանկալի օգնություն ստանալու համար: Նման փորձեր կատարվել էին նաև նախկինում՝ XIII դարում՝ 1274 թ., 1288 թ. և այլ թվականներին⁵: XIV դ. սկզբին Կիլիկյան Հայաստանը շարունակում էր իր գոյամարտը շրջակա իսլամադավան տերությունների ոտնձգությունների դեմ, և պետության ղեկավարների մի մասը ստեղծված իրավիճակից դուրս գալու ուղիներ էր փնտրում, որոնցից մեկն օգնություն ստանալու ակնկալիքն էր Արևմուտքից:

Կիպրոսը և Կիլիկյան Հայաստանը շարունակում էին մնալ Արևմուտքի քրիստոնեական երկու հենարաններն Արևելքում: Եվ Կիլիկյան Հայաստանով էր, որ անցնում էին դեսպանները, քարոզիչները և այլն⁶: Բացի այդ, հայ իշխաններից շատերը և արքաների մի մասը կապված էին Արևմուտքի հետ խնամիական կապերով⁷: Կիլիկիայի հայկական թագավորության և Մերձավոր Արևելքի իսլամադավան պետությունների հակամարտությունը Արևմուտքում ընկալվում էր որպես քրիստոնեության և իսլամի պայքար՝ «սրբազան պատերազմ», իսկ Կիլիկյան Հայաստանը համարվում էր ոչ միայն քրիստոնեության պաշտպանության, այլև դեպի Արևելք նրա տարածման առաջին ամրոցը⁸: Կիլիկյան Հայաստանի վերնախավը, հասկանալով, որ ավելի վտանգավոր են դառնում Եգիպտոսի սուլթանության և նրա դաշնակիցների հարձակումները, փորձ կատարեց համաձայնվել Պապի առաջարկի հետ և ընդունել կաթոլիկություն⁹: Հռոմի Պապը, հասկանալով, որ Իրանի մոնղոլների մոտ կաթոլիկության տարածումը տապալվեց (նրանք 1295 թ. իսլամ ընդունեցին)¹⁰, իր ողջ ուշադրություն-

⁴ Bibliotheque des Croisades, t. IV, Paris, 1829. p. 505-507, **F. Gabrieli**, Arab historians of the Crusades, London, 1978, p. 308, Մանր ժամանակագրություններ XIII-XVIII դարերի, հ. II, Երևան 1956, էջ 78, **Ստեփանոս Օրբելյան**, Պատմություն նահանգին Սիսական, Թիֆլիս, 1910, էջ 442, **Makrizi**, Histoire des Sultans Mamelouks, Paris, 1837, t. II, part III, p. 120-125: Այդ մասին տե՛ս նաև **R. Rohricht**, Geschichte des Konigreichs Jerusalem, (1100-1291), Amsterdam, 1966, p. 1002, **М. Заборов**, Крестовые походы, М. 1980, с. 267.

⁵ **S. Runciman**, A history of the Crusades, vol. III, p. 341, **A. Atiya**, The Crusade in the Latter Middle Ages, London, 1970, p. 37, **Մ. Բուռնազյան**, Սոցիալ-տնտեսական հարաբերությունները Կիլիկյան հայկական պետությունում, Երևան, 1973, էջ 34:

⁶ **Ժ. Ռիշար**, Ավինյոնի պապությունը և Հայաստանը, ՊԲՀ, 2001, N1, էջ 152, **Հ. Բարթիկյան**, Կիլիկյան Հայաստանի և Բյուզանդական կայսրության եկեղեցական փոխհարաբերությունները և դրանց քաղաքական ծայքերը, Հայ-բյուզանդական հետազոտություններ, Հ. Ա., Երևան, 2002, էջ 124:

⁷ **W. Roud-Collenberg**, The Rupenides, Hethumides and Lusignans, The structure of the Armeno-Cilician Dynasties, Paris, 1963, p. 13, 15, **R. Grousset**, L'Empire du Levant, Paris, 1946 թ. 407, **Մ. Դավիթ-Բեկ**, Լուսինեանք, Վիեննա, 1900, էջ 13: **Արտավազդ արքեպիսկոպոս**, Հայ-լատին հարաբերությունները հույն-լատին հարաբերությանը լույսով, Էջմիածին, 1945, Ա-Բ, էջ 22:

⁸ **Գ. Հարությունյան**, Քրիստոնեական եկեղեցիների համընդհանրության գաղափարը Սսի 1307 թ. ժողովում, Հայկազեան հայագիտական հանդես, Պէյրուք, 1994, Հ. ԺԴ, էջ 148:

⁹ **Г. Микаелян**, История Киликийского армянского государство, Ереван, 1952, с. 441-442.

¹⁰ **K. E. Lupprian**, Die Beziehungen Der papste zu islamischen und mongolischen Herrschern im, Vaticana, 1981, p. 56-58, **B. Spuler**, The Muslim World, Part II, Leiden, 1960. p. 35, Encyclopaedia Iranica, vol V, California, 1992,

նր կենտրոնացրեց հայկական թագավորության վրա, քանի որ Կոմեն Ե-ն Կիպրոսը և Կիլիկյան Հայաստանը համարում էր իր դաշնակիցը և առավել հարմար պատնեշը:

Ահա այս ժամանակաշրջանում էլ սկսվեց և մինչև Կիլիկյան Հայաստանի անկումը շարունակվեց պայքարը կաթոլիկության ընդունման համար: Նման պայմաններում Հայ Եկեղեցու ներսում առաջացան քաղաքական երկու հակադիր խմբավորումներ, որոնք կատաղի պայքար սկսեցին միմյանց դեմ¹¹: Նրանց մի մասը ցանկանում էր ընդունել կաթոլիկությունը (միութենասեր) և օգնություն ստանալ Արևմուտքից, իսկ մյուս մասը դեմ էր դրան (միութենամերժ): Վերջիններս դեմ չէին եկեղեցիների միությանը, սակայն դեմ էին հրաժարվելու Հայ Եկեղեցու դավանաբանական ու ծիսական ավանդույթից¹²:

1306 թ. գարնանը Լևոն Դ-ի դեսպանները Նեապոլի վրայով ուղևորվեցին Հռոմ և Փարիզ: Կոմեն Ե Պապը, օգնություն խոստանալով, պահանջեց, որ Կիլիկիայի Հայ Եկեղեցին ընդունի Կաթոլիկ Եկեղեցու ծիսակատարություններն ու դավանաբանական սկզբունքները¹³: Փաստորեն, դիվանագիտական հարաբերությունները շոշափեցին նաև դավանաբանական խնդիրներ, ինչը վկայում է այն մասին, որ սոցիալ-քաղաքական շահերից բացի մեծ կարևորություն էին ներկայացնում նաև հոգևոր, մասնավորապես կրոնական հետաքրքրությունները: Լատինական արևմուտքի և Բյուզանդիայի հետ մշակվող քաղաքական հարաբերություններում որոշիչ դեր էին խաղում նաև կրոնական հարցերը: Արքունիքներից բացի դեսպանները հաճախ թակում էին պատրիարքական ու պապական նվիրապետությունների դռները: Դավանաբանական զիջումների ճանապարհով արևմտյան Եվրոպայից և Բյուզանդիայից օգնություն ստանալու քաղաքական ծրագրի կենսագործման ճանապարհին կարևոր փուլ էր 1307 թ. Սաի եկեղեցական ժողովը: Հայտնի է, որ XIII դարի վերջին և XIV դարի սկզբներին Կիլիկիայի Հայկական Եկեղեցին գլխավորում էր Գրիգոր Է Անավարզեցին (կթդ. 1293-1306/07): Ինչպես նշում է Եզնիկ արքեպիսկոպոս Պետրոսյանը՝ այս կաթողիկոսն ընդհանուր քրիստոնեական եկեղեցիների միության գաղափարով տարված մի անձնավորություն էր, որը այդ նպատակի համար պատրաստ էր գոհել Հայ Եկեղեցու որոշ ավանդություններ¹⁴:

Հետագոտողի այդ տեսակետը պաշտպանում է նաև Մելքիսեդեկ վարդապետ Մուրադյանը¹⁵: Խոսելով Գրիգոր Է Անավարզեցու մասին՝ պետք է նշել նաև, որ նրա օրոք հայոց կաթողիկոսությունը Հռոմկլայից տեղափոխվեց մայրաքաղաք Սիս¹⁶: Բացի այդ, կաթողիկոսը փորձեց փոփոխություններ մտցնել մի շարք ծիսա-

p.134, The Cambridge history of Iran, vol V, Cambridge, 1968, p. 380-382, Encyclopaedia of Islam, vol II, London, 1965, p. 1043, **К. Босворт**, Мусульманские династии, Москва, 1971, с. 201, **И. Пигулевская**, История Ирана с древнейших времен до конца XV века, Москва, 1977, с. 199-200.

¹¹ **Г. Микаелян**, նշվ աշխ., p. 441:

¹² **Եզնիկ վրդ. Պետրոսյան**, Հայ Եկեղեցու պատմություն, Ս. Էջմիածին, 1995, էջ 136:

¹³ **A. S. Atiya**, The Crusade in the later Middle Ages, London, 1938, p.62-63, **J. Richard**, Les Arméniens. a Avignon au XIV e siecle, Revue des Etudes Arméniens, t. XIII, Paris, 1992, p. 253-254:

¹⁴ **Եզնիկ վրդ. Պետրոսյան**, նշվ. աշխ., էջ 156:

¹⁵ **Վ. վրդ. Մուրատեանց**, Պատմություն Հայաստանեայց Առաքելական Սուրբ Եկեղեցու, Յերուսաղեմ, 1872, էջ 474:

¹⁶ **Սամվել Անեցի**, Հաւաքմունք ի գրոց պատմագրաց, Վաղարշապատ, 1895, էջ 165:

կան հարցերում: Նա պատվիրեց ճրագալույցներին պահք չլուծել, հիվանդների համար ձեթ օրհնել, Ս. բաժակի մեջ ջուր խառնել և այլն: Միաժամանակ կաթողիկոսը հույներից պահանջեց, որ իբրև փոխհատուցում, Անտիոքի պատրիարքական աթոռը ենթարկվի հայոց կաթողիկոսությանը¹⁷: Անշուշտ Գրիգոր Անավարզեցու փոփոխությունները լուրջ դժգոհություն առաջացրին պատմական Հայաստանում: Այդ է վկայում նաև Ստեփանոս Օրբելյանը՝ նշելով, որ Սյունյաց միտրոպոլիտի նախագահությամբ մի ժողով գումարվեց և մի նամակով կաթողիկոսին զուշացրեցին, որպեսզի Հայ Եկեղեցու ավանդույթների մեջ փոփոխություններ չմտցնի¹⁸: Հավանաբար հայոց կաթողիկոսի նման դիրքորոշումը բացատրվում էր այն հանգամանքով, որ վերջինս փորձում էր օգնություն ստանալու նպատակով ինչ-ինչ փոփոխություններ կատարելով, ստանալ Հռոմի Պապի և եվրոպական տերությունների աջակցությունը: Կաթողիկոսը պատրաստվում էր նաև փոփոխություններ մտցնել Հայ Եկեղեցու ծիսակարգում և այդ նպատակի համար առանձին շարականներ գրեց՝ Քրիստոսի Ծննդյան և Մկրտության տոների համար՝ ծրագրելով այդ տոները միայնցից բաժանել, սակայն տեսնելով, որ օգնություն չի կարողանում ստանալ, նա ավելորդ համարեց այլևս եկեղեցիների միության խնդրով զբաղվել: Պետք է նաև նշել, որ այս ջրջանում Արևմուտքի հետ հարաբերությունների զարգացման օգտին էին գործում նաև Հեթում թագավորահայրը և Լևոն Դ արքան (1301-1307):

Ա. Սուքիասյանը նշում է, որ Հեթում Բ-ն դեռևս իր հոր կենդանության ժամանակ կաթոլիկություն ընդունեց և դարձավ ֆրանցիսկյան միաբանության անդամ¹⁹: Թագավորահայրը գլխավորեց երկրի լատինասերների հոսանքը և պահանջեց, որ հայերը կաթոլիկություն ընդունեն և միավորվեն Կաթոլիկ Եկեղեցու հետ²⁰: Իբրև քաղաքական գործիչ՝ Հեթում Բ-ն, լինելով հոգևոր եղբայրության անդամ, չէր բաժանվում սրից և վանականի գավազանից: Նա չթագադրված միապետ էր, խոստովանահայր, խնամակալ, «արտավանքային» վանական: Աչքի էր ընկնում անկայունությամբ և մեկ ծայրահեղությունից մյուսն էր ընկնում. գործում էր ըստ իրադրության, սխալ կերպով կարծում էր, թե հայկական պետությունը կարող է հույսը դնել պապի օգնության վրա²¹:

Կաթողիկոսը արքայի ու Հեթում Բ-ի պահանջով իր մատուցած Պատարագներին հաղորդության բաժակի մեջ ջուր էր խառնում և, այդպիսով, օրինակ դառնում նաև ուրիշների համար: Այնուհետև, թագավորահայրը և արքան կաթողիկոսից պահանջեցին երկու Եկեղեցիների միջև կատարյալ միություն հաստատել: Կաթողիկոսը մերժեց այդ պահանջը, որի պատճառով էլ գահընկեց արվեց և աքսորվեց, որտեղ էլ մահացավ 1306 թ.²²: Մատենագիրները հաղորդում են, որ մահվան անկողնում նա հայտարարել է. «Հայ եմ և հայ մեռանիմ»: Փաստորեն, վերլուծելով Լևոն Դ-ի և Հեթում թագավորահոր գործունեությունը, կարելի է եզրակացնել, որ նրանք ավելի մեծ

¹⁷ Եզնիկ վրդ. Պետրոսյան, նշվ. աշխ., էջ 156:

¹⁸ Ստեփանոս Օրբելյան, էջ 197-210:

¹⁹ Ա. Սուքիասյան, նշվ. աշխ., էջ 90:

²⁰ Նույն տեղում:

²¹ Նույն տեղում:

²² Մամվել Անեցի, նշվ. աշխ., էջ 164:

մասնակցություն են ունեցել կաթողիկոսության ընդունմանը, քան կաթողիկոսը: Բացառված չէ նաև այն հանգամանքը, որ հայոց կաթողիկոսը հարկադրված էր արևմտամետ շատ գործեր և փոփոխություններ կատարել՝ չկարողանալով մերժել արևմտամետ այդ երկու գործիչների պահանջները:

Վերադառնալով 1307 թ. եկեղեցական ժողովին՝ պետք է նշել նաև, որ այն ընթացել է չափազանց լարված պայմաններում, քանի որ ինչպես նշում է Ա. Տեր-Միքելյանը, 1307 թ սկսած առաջ եկան եկեղեցական տարաձայնություններ, որոնց մեջ գործող գլխավոր դերը պատկանում էր թագավորներին²³:

1307 թ. Միսում տեղի ունեցած եկեղեցական ժողովի օրակարգում դրված էր երկու հիմնական հարց.

1. Նոր կաթողիկոսի ընտրություն,
2. Կաթողիկոսության ընդունում:

Նախ՝ ժողովն ընտրեց նոր կաթողիկոս՝ Կոստանդին Գ Կեսարացուն (կթդ. 1307-1322)²⁴: Այնուհետև քննարկվեց երկրորդ կարևոր խնդիրը՝ կաթողիկոսության ընդունման հարցը: Հետագոտող Եզնիկ վրդ. Պետրոսյանի վկայությամբ՝ ժողովին մասնակցում էին Կիլիկիայի հայկական թագավորության 43 եպիսկոպոսներ և իշխաններ²⁵: Ի տարբերություն նրա՝ Մ. Չամչյանը և Ա. Մխիթարյանը²⁶ նշում են ժողովական 41 մասնակիցների: Առավել հավանական ենք համարում 41-ը, քանի որ Մ. Չամչյանը իր աշխատության մեջ հիշատակում է բոլոր մասնակիցների անունները: Սակայն չի կարելի բացառել նաև այն տարբերակը, որ երկու վերլուծաբանների տեսակետներն էլ նույնն են: Պարզապես Մ. Չամչյանը Լևոն արքային և Հեթում թագավորահորը չի նշել, իսկ Եզնիկ եպս. Պետրոսյանը նրանց նույնպես մասնակիցների թվին է գումարել: Հայոց արքան ժողովին ներկայացրել է մի նամակ, որն իբրև թե գրված է եղել Գրիգոր Անավարզեցու կողմից: Այն կառուցված էր 9 գլխից և հիմնականում բովանդակում էր հետևյալ դավանաբանական ու ծիսական փոփոխությունները՝

1. Ս. Բաժակի մեջ ջուր խառնել,
2. Ընդունել 7 տիեզերական ժողովների որոշումները,
3. Քրիստոսի մեջ խոստովանել 2 բնություն, 2 կամք, 2 ներգործություն,
4. Տերունական տոները տոնել հույների և լատինների հետ, Ծնունդը՝ դեկտեմբերի 25-ին, Ավետումը՝ մարտի 25-ին, Տեառնընդառաջը՝ փետրվարի 2-ին և այլն,
5. Ս. Ծննդյան և Ս. Հարության ճրագալույցները լուծել միայն ձեթով և ձկով:
6. «Ս. Աստուած»-ը երգել «Քրիստոս» բառի հավելումով... «Քրիստոս, որ խաչեցար»:

Հիշատակումներ են պահպանվել նաև այն մասին, որ ժողովականները, բացա-

²³ Ա. Տեր-Միքելյան, Եկեղեցական աղմուկները ԺԴ դարի սկզբում, «Արարատ», Վաղարշապատ, 1839, էջ 507:

²⁴ Աբել արքեպիսկոպոս Մխիթարեանց, Պատմություն ժողովոյ Հայաստանեայց Եկեղեցոյ հանդերձ կանոնադրությամբ, Էջմիածին, 1874, էջ 132-133, Հ. Մովսիսյան, նշվ. աշխ., էջ 221, Մ. վրդ. Մուրադյանց, նշվ. աշխ., էջ 474, Մ. Օրմանյան, Հայոց Եկեղեցին..., Երևան, 1993, էջ 93:

²⁵ Եզնիկ վրդ. Պետրոսյան, նշվ. աշխ., էջ 158:

²⁶ Մ. Չամչյան, նշվ. աշխ., էջ 309, Ա. Մխիթարյանց, նշվ. աշխ., էջ 132-133:

ռությամբ 5 եպիսկոպոսների, ընդունեցին առաջարկվող փոփոխությունները²⁷:

Միջնադարյան պատմիչներից Ս. Անեցու երկը շարունակողներից մեկը հետևյալ տեղեկություններն է մեզ տրամադրում վերոհիշյալ դեպքերի կապակցությամբ. «ՌՅԹ (ՉԾԶ) արար ժողով աւագ Պարոնն Հեթում և միաբանեցան ընդ եկեղեցին Հռոմայ և հաւանեցին առնել զգօն ծննդեան Քրիստոսի Դեկտեմբերի ԻԵ. և զամենայն տօնս սրբոց՝ յիրաքանչիւր տեղիս ուր և դիպեցի: Այլն արկանել ջուր ի սուրբ խորհուրդն. և այս գործեցաւ ի թիվն ՉԾԶ ի Սուրբ Զատիկն»²⁸:

Հետագոտողներից Մ. Օրմանյանը²⁹ և Ա. Սուքիասյանը³⁰ միահամուռ կերպով պնդում են, որ վերոնշյալ ժողովը տեղի է ունեցել 1307 թ. մարտի 19-ին: Ու թեև ժողովը առաջարկվող փոփոխությունների վերաբերյալ որոշում ընդունեց, այնուամենայնիվ լուրջ ընդդիմություն առաջ բերեց ինչպես Կիլիկիայի հայկական թագավորությունում, այնպես էլ պատմական Հայաստանում:

Խնդիրն այն է, որ թե՛ ժողովուրդը և թե՛ իշխանների ու հոգևորականության մեծագույն մասը դեմ էին Սսի ժողովի ընդունած որոշմանը և ամենևին էլ չէին պատրաստվում դրանք կիրառել գործնականում: Պետք է նկատել նաև, որ Սսի 1307 թ. ժողովից հետո Կիլիկիայի հայկական թագավորությունում խիստ սրվեց ներքաղաքական իրադրությունը: Այս կապակցությամբ Մ. Չամչյանը նշում է հետևյալը. «Սոյ ժողովին ամենաջերմ պաշտպաններն ալ կը խոստովանին, թէ եպիսկոպոսներ չհամարձակեցան ամեն տեղ գործադրութեան մտցնել անոր կանոնները... Եւ Սոյ կանոնները ունեցան խափանումն գործածութեան...»³¹:

Սսի եկեղեցական ժողովի որոշումը ունեցավ այն հետևանքը, որ երկրում առաջացան իրարամերժ խմբավորումներ՝ ունիթորներ և հակաունիթորներ, որով էլ ավելի թուլացավ երկրի քաղաքական միասնությունը: Բացի այդ պակաս կարևոր չէր նաև այն հանգամանքը, որ ավելի սրվեցին Կիլիկիայի հայկական թագավորության հարաբերությունները շրջապատող իսլամադավան պետությունների հետ: Վերջիններս այդ որոշումը դիտում էին, որպես խաչակիրներին Արևելք հրավիրելու նոր փորձ³²:

1308 թ. Կիլիկյան Հայոց գահին բազմեց Օշին արքան (1308-1320թթ.), որի օրոք ևս փորձեր կատարվեցին արմատավորել Սսի 1307 թ. ժողովական որոշումը: Ի պատասխան դրա 1308 թ. և 1309 թ. տեղի ունեցան հակակառավարական ցույցեր, որոնց մասնակցեցին ժողովրդական զանգվածները և մեծաթիվ հոգևորականներ³³: Օշին արքան արյունալի դատաստան տեսավ ապստամբների հետ: Նրանցից շատերը մահապատժի ենթարկվեցին, վարդապետները բանտ նետվեցին կամ արտաքսվեցին Կիպրոս կղզի: Այդ ամենն էլ հիմք են տալիս վստահաբար պնդելու, որ միայն արքունիքն ու կաթողիկոսարանն էին կողմնակից եկեղեցիների միավորմանը: Սակայն պետական հալածանքները չկարողացան վերջնականապես ճնշել ժողովրդին: Թա-

²⁷ Եզնիկ վրդ. Պետրոսյան, նշվ. աշխ., էջ 158:

²⁸ Մամվել Անեցի, նշվ. աշխ., էջ 155:

²⁹ Մաղաքիա արք. Օրմանյան, նշվ. աշխ., սյուն 2107:

³⁰ Ա. Սուքիասյան, նշվ. աշխ., էջ 90:

³¹ Մ. Չամչյան, նշվ. աշխ., էջ 309:

³² Հայ ժողովրդի պատմություն, հ. III էջ 766:

³³ Ա. Մխիթարեան, նշվ. աշխ., էջ 135:

գավորի քաղաքականությանը կողմ էին հատկապես Կիլիկիայում բնակություն հաստատած լատինական տարրերը, բարձրաստիճան որոշ հոգևորականներ և արքունիքի առանձին հեղինակավոր ծառայողներ: Հենց նրանք էլ հարում էին այսպես կոչված միարարական հոսանքին, այսինքն՝ համաձայն էին, որ Հայ Եկեղեցին ենթարկվի Հռոմի Պապին: Ի հակակշիռ դրա՝ Կիլիկիայի բնակչության և հոգևորականության մեծ մասը (հատկապես հոգևորականության ստորին շերտերը), խոշոր հողատերերի զգալի մասը, աշխատավորական զանգվածները դեմ էին միությանը և կազմում էին հակամիարարական հոսանքը:

Փաստորեն պետք է նշել, որ XIV դ. առաջին տասնամյակում հայ-հռոմեական ակտիվացած հարաբերություններն այն արդյունքն ունեցան, որ երկրում ներքին քաղաքական իրադրությունը սրվեց, իսկ միարարության վերաբերյալ Մսի 1307 թ. եկեղեցական ժողովի որոշումը ավելի գրգռեց Կիլիկիայի գլխավոր թշնամու՝ Եգիպտոսի սուլթանության զայրույթը: Ինչ վերաբերում է Հռոմի Պապին, ապա նա իր խոստացած օգնությունը չուղարկեց Կիլիկյան Հայաստան:

Ահա այսպիսին էին Հայ Եկեղեցու հարաբերությունները Հռոմի պապական աթոռի հետ և նրա հետևանքները XIV դարի առաջին տասնամյակում: